



Äntwert vum Här Minister fir sozial Sécherheet op d'parlamentaresch Fro n°7697 vum 2. Mäerz 2023 vum honorabelen Deputéierten Här Sven Clement iwwert d'Leeschunge vun der Gesondheetskeess (CNS)

1) Wéi oft ass et an deene leschte 5 Joer, opgelëscht pro Joer, virkomm, dass d'CNS eng Decisioun réckwierkend geännert huet?

2) Wéi oft ass et an deene leschte 5 Joer, opgelëscht pro Joer, virkomm, dass d'CNS eng Decisioun réckwierkend geännert huet, well si festgestallt hunn, dass si fälschlecherweis Leit Leeschtungen accordéiert hunn, déi dës eigentlech net zegutt haten?

Fir d'éischt ass ze bemierken dat d'Recalculen net mat méigleche Feeler vun der Gesondheetskeess (CNS) oder der Administratioun fir d'Evaluatioun an d'Kontroll vun der Fleegeversécherung (AEC) zesammen hänken, mee éischer domadder ze dinn hunn, dat d'Donnéeën an d'Informatiounen, op deenen sech d'Decisioun baséiert, entweder méi spéit revidéiert, ergänzt oder korrigéiert goufen. Dat kann zum Beispill doduerch bedéngt sinn dat d'Situatioun vun enger Persoun ännert, mee déi Infoen entweder vun der Persoun selwer oder vun engem Drëtten (Prestataire), eréischt méi spéit eragereecht oder à jour gesat ginn.

E konkret Beispill ass wann eng Persoun an der Fleegeversécherung (Beneficiaire) net méi Doheem ka gefleegt ginn, wou en Aidant dee Moment d'Actes essentiels de la vie (AEV) gelescht huet, an de Beneficiaire kuerzfristeg an engem Etablissement huet missten ënnerkommen. Doduerch dat dës Info net direkt disponibel ass, beziehungsweise dat mat engem Decalage an der Zäit verbonnen ass, kritt de Beneficiaire nach ëmmer déi Geldleeschtung iwwerwisen, mee muss déi da réckwierkend un d'CNS zeréckgi well fir déi Period d'Sachleeschungen, a Platz vun de Geldleeschungen, an Usproch geholl goufen.

En anert Beispill ass eng Oppositioun par Rapport zu enger Decisioun vun der CNS, wou dee Moment op Basis vun nei oder zousätzlech Infoen d'Evaluatioun an doduerch och d'Decisioun vun der CNS ugepasst gëtt, beziehungsweise eng nei Decisioun geholl gëtt.

Et ass also net esou dat d'Decisioun per se falsch ass, mee déi baséiert eben op deenen Infoen a Donnéeën déi zu deem Zäitpunkt disponibel sinn. Dës kann och um Niveau vun der Evaluatioun vun der AEC spillen, op deenen sech d'CNS fir hir formell Decisioun baséiert.

Wat elo déi konkret Froen vum honorabelen Deputéierten ubelaangt, stellen d'Rektifikatiounen ënnert 1% vun all den traitéierten Dossiere „Aides et soins“ duerch d'AEC duer.

Iwwert d'Joren 2019 bis 2022 hunn 83% vun de Rektifikatioune kee Changement op de « Niveau de dépendance » gehat. An deene Fäll wou d'Rektifikatioun en Impakt op de « Niveau de dépendance » huet, ass dës Ännerung meeschtendeels zu Gonschte vum Bénéficiaire.

D'AEC mëcht e Monitoring vun de Rektifikatiounen, déi esou wuel de Requis vun den Hëllef- a Fleegeleeschunge kënnen betreffen, wéi awer och d'Opdeelung vun de Leeschtungen tëschent dem Aidant an dem Fleegegedéngscht oder fondéiert Oppositiounen nodeems e Recours bei der CNS era gereecht gouf.



	2019		2020		2021		2022		2023	
Nombre total des rectifications	238		145		124		127		9	
Dont aucun changement du niveau	177	74%	122	84%	112	90%	105	83%	7	78%
Dont augmentation du niveau	37	16%	23	16%	12	10%	19	15%	2	22%
Dont diminution du niveau	24	10%	0	0%	0	0%	3	2%	0	0%
Augmentation d'un niveau	33	89%	16	70%	12	100%	13	68%	2	100%
Augmentations de 2 niveaux	1	3%	6	26%	0	0%	3	16%	0	0%
Augmentations de 3+ niveaux	3	8%	1	4%	0	0%	3	16%	0	0%

3) Eis si Fäll bekannt, wou Persounen innerhalb vun e puer Deeg gréisser Zomme sollten zrëckbezuelen, déi si fälschlecherweis accordéiert kruten. Wann si dëser Opfuerderung net nokommen, kréien si Leeschtungen, zum Beispill beim Remboursement vu Rechnungen, oder bis zu 50% vum Kannergeld, dat eigentlech fir den Ënnerhalt vum Kand geduecht ass, gestrach. Beim Steieramt ass et esou, dass all Contribuabel d'Méiglechkeet huet, no enger Besteuerung, a virun der Echeance vun dëser Besteuerung, duerch eng motivéiert Demande, een Délai de Paiement ouni Zënsen (Délai de Paiement bis zu 4 Méint) oder een Délai de Paiement mat reduzéierten Zënsen (Délai de Paiement tëschent 5 Méint an 12 Méint: 0,1 Prozent pro Mount oder Délai de Paiement tëschent 13 Méint bis 3 Joer: 0,2 Prozent pro Mount) beim Steierbüro unzefroen (Äntwert op d'QP N° 6146). D'Héicht vun den Zënsen déi pro Mount berechent ginn hänkt also vun der Lafzäit vum Délai de Paiement of. Firwat bitt d'CNS hiren Assuréeën net déi selwecht Méiglechkeeten un, amplaz hinne Leeschtungen ze sträichen an si esou an eng prekär Situatioun ze bréngen?

Am Allgemenge kréien déi betraffe Persounen eng Demande fir d'Restitutioun vun de Montanten déi sie ursprénglech accordéiert kruten. Falls déi gefrote Restitutioun net stattfënnt, gëtt de Leit e Rappel geschéckt a gegebenfalls och eng offiziell Notifikatioun.

Beim Beispill vun de Geldleeschtungen, gëtt d'Restitutioun bei der betraffener Persoun per Courier ugefrot. Am Fall wou no 6 Woche keng Reaktioun op dës Opfuerderung kënnt, gëtt eng Erënnung erausgeschéckt, iert dono déi aner legal Moyenen, déi ernimmt ginn, a Betruecht gezu ginn.

Et ass och ze erwänen, dass d'CNS de Leit, op hir Demande hin, kann en gestaffelte Plang fir d'Réckbezuelung ubidden.

Am Fall wou déi betraffe Persoun der Opfuerderung net nokënnt, versicht d'CNS déi fälschlecherweis accordéiert Montanten, de legalen Dispositiounen vum Artikel 396 vum Code vun der sozialer Sécherheet no, ze recuperéieren andeems op Leeschtunge vun der CNS oder aneren Institutiounen vun der sozialer Sécherheet zeréckgegraff gëtt.

Wat d'Fleegeversécherung ugeet, gëtt am Fall vun enger Réckbezuelungsufro déi betraffe Persoun per Courier ugeschriwwen an et gëtt hir systematesch e gestaffelte Réckbezuelungsplang proposéiert.

D'Gesondheetskeess fuerdert och keng Zënsen fir esou Réckbezuelungen. Et mussen also just déi Montanten zeréck iwierweise ginn, déi net geschëlt waren.

Et gëtt also ëmmer probéiert, zesumme mat der betraffener Persoun, eng Léisung ze fanne fir déi Leeschtungen, déi net geschëlt waren, de finanzielle Méiglechkeete vun der betraffener Persoun no



zeréckzebezuelen, wann déi Persoun och de Kontakt mat der CNS sicht, beziehungsweise sie de Plang, deen fir d'Reckbezuelung opgestallt gouf, och anhält.

4) Fir géint eng Entscheidung vun der CNS kënn Recours beim Gericht anzeleeë brauch eng betraffe Persoun eng sougenannten Décision présidentielle aus der Direktioun vun der CNS. Wéi laang ass aktuell d'Durée de traitement bei den Décision présidentielle?

5) Wat war op déi leschte 5 Joer gekuckt déi längsten Durée de traitement bei den Décision présidentielle?

Iwwert d'Joren 2019 bis 2023 sinn 380 Oppositionen traitéiert ginn, woubäi den Duerchschnëtt vum Gesamttraitement, dat heescht tëschent der Receptioun vun der Opposition vun der CNS bis zur Notifikatioun vun der Decisioun, bei 75,9 Deeg läit. Den Duerchschnëttstraitement vun der AEC, dat heescht tëschent der Receptioun duerch d'AEC an dem Datum vun der Validatioun, läit bei 31,4 Deeg.

Dës Weideren ass ze betounen dass d'Decisionen der Urgence no prioritär traitéiert ginn. D'Veraarbechtung vun enger Decisioun bréngt d'Noutwendegkeet vu verschiddenen Informatiounen mat sech, wat dann och eng Auswierkung op d'Dauer kann hunn.

Lëtzebuerg, den 5. Abrëll 2023

De Minister fir sozial Sécherheet

(s.) Claude Haagen